



# SIARAN MEDIA

## KeTSA DAN FAM KUKUHKAN KERJASAMA DALAM USAHA KONSERVASI HARIMAU MALAYA

Menteri Tenaga dan Sumber Asli, YB. Datuk Seri Takiyuddin bin Hassan dan Presiden Persatuan Bolasepak Malaysia (FAM), YBhg. Datuk Haji Hamidin bin Haji Mohd Amin telah menyaksikan majlis menandatangani Memorandum Persefahaman (MoU) antara Jabatan Perlindungan Hidupan Liar dan Taman Negara (PERHILITAN) dan FAM pada hari ini.

MoU tersebut bertujuan untuk melaksanakan kerjasama strategik dalam Kempen Selamatkan Harimau Malaya bagi memastikan Harimau Malaya yang menjadi simbol Jata Negara tidak pupus di atas muka bumi ini.

Majlis memeterai MoU pada hari ini sangat bermakna kerana FAM sinonim dengan Harimau Malaya. Pasukan bola sepak kebangsaan kita sejak sekian lama dikenali dengan nama Harimau Malaya bagi melambangkan semangat juang yang tinggi dan tidak mudah menyerah kalah. Semangat juang sebegini diperlukan untuk menangani krisis kepupusan Harimau Malaya.

Kerjasama strategik ini dilihat dapat mengukuhkan lagi usaha-usaha sedia ada Kerajaan melalui Kempen Selamatkan Harimau Malaya bagi meningkatkan penglibatan dan kesedaran masyarakat. Di samping itu, ia dapat meningkatkan imej pasukan bola sepak kebangsaan sebagai pasukan yang prihatin terhadap spesies ikonik negara.

Pengukuhan kerjasama strategik antara Kerajaan dan FAM dalam konservasi Harimau Malaya sewajarnya menjadi pemangkin kepada usaha-usaha konservasi biodiversiti melalui penglibatan kolektif semua pihak termasuk badan korporat dan badan bukan kerajaan. KeTSA dan FAM berharap semua pihak dapat meningkatkan amalan kemampunan serta melipatgandakan usaha dalam memelihara dan memulihara biodiversiti negara yang tidak ternilai.

**KEMENTERIAN TENAGA DAN SUMBER ASLI  
PERSATUAN BOLASEPAK MALAYSIA (FAM)**

**3 DISEMBER 2021**

Unit Komunikasi Korporat | Kementerian Tenaga dan Sumber Asli No. Tel. : 03-8000 8000 | Faks : 03-8889 4763 | Web : [www.ketsa.gov.my](http://www.ketsa.gov.my)



KeTSAMalaysia



[ketsa.malaysia](https://www.instagram.com/ketsa.malaysia)



KeTSAMalaysia